



**JUDICIAL SYSTEM MONITORING PROGRAMME
PROGRAMA MONITORIZASAUN SISTEMA JUDICIAL**

*Komunikadu Imprensa
06 Junu 2013*

Tribunál fó pena admoestasaun ba arguidu krime violénsia doméstika

Iha loron 05 Juñu 2013 Tribunál Distritál Díli hala'o julgamentu ba kazu violénsia doméstika ne'ebé komete husi arguidu Tome da Costa hasoru lezada Luciana da Costa nu'udar arguidu nia bin boot. Kazu ne'e akontese iha Aldeia Klac Fuik, Suku Becora, Sub-distritu Cristo Rei-Dili.

Ministériu Públiku akuza katak iha 08 Maiu 2012, oras tuku 7:00 kalan arguidu ho nerbozu lori kadeira masa baku lezada nia liman to`o bubu, motivu husi akontesementu ne'e tanba arguidu la kontente ho reuniaun ne'ebé hala`o iha Taibesi. Arguidu dehan katak lezada diriji reuniaun ne'e arbiru de'it no konta historia mak barak. Tribunál prova katak arguidu rekoñese faktus sira ne'ebé akuza ba arguidu.

"JSMP louva autór judisiáriu sira tanbá fó prioridade atu julga kazu violénsia doméstika, ne'e hanesan pasu importante atu elimina violénsia hasoru fetu iha Timor Leste" dehan Diretór Ezekutivu JSMP Luis de Oliveira Sampaio.

Ministériu Públiku akuza arguidu kontra artigu 145 Kódigo Penál kona-ba ofensas ba integridade física simples konjuga ho artigu 2, 3 no 35 alinea (b), Lei Kontra Violénsia Doméstika.

Iha alegasaun Ministériu Públiku husu ba tribunál atu kondena arguidu nune'e labele repete iha futuru.

Defeza argumenta katak krime ne'e fó fatin ba aplika pena multa, maibé faktus ne'ebé produz atenua arguidu. Purzemplu, agora sira di'ak malu, arguidu nia kondisaun ekonomia fraku la justu atu aplika multa tanba nia agrikultor. Tanba ne'e, defeza husu fó pena admoestasaun. Hare ba faktus ne'ebé provadu tribunál decide pena admoestasaun ba arguidu sein kusta judicial.

Kazu ne'e rejistu iha tribunál ho Númeru Prosesu: 671/2013/TDD. Julgamentu prezide husi Juis Dr. Duarte Tilman. Ministériu Públiku representante husi Dr. Reinato Bere Nahak no arguidu hetan defeza husi Dr. Leonidio Marques ho Dr. Juvinal Yanes Freitas Defensór Estajiadu. Ofisiál Justisa ne'ebé responsavel iha prosesu mak Sr. Valenti Filipe.

Atu hetan informasaun kle'an liután favór kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org

info@jsmp.minihub.org

Telefone: 3323883 | 77295795

Website: www.jsmp.tl

Facebook: www.facebook.com/timorleste.jsmp

Twitter: @JSMPtl